

S'è butasse dlong a rie  
 Ch' a savia la rason,  
 Ch' a fasio ste folie,  
 E conteise da tomon.  
 Ch' a fasio, ecc.

A l'è subit staita lesta  
 A piè 'l vas da sot al let,  
 L'ha largailo su la testa  
 Spas e rair tut bin confet.  
 L'ha largailo, ecc.

Cousti gonzo son sentisse  
 Così bin ambalsemà,  
 Si ch' d' si ch' a son spartisse  
 Senza gnanca pi fè fià.  
 Si ch' d' si, ecc.

Delle qualità delle Donne.

### CANZONE XVIII.

Chi sta amis con le fumele  
 N'avrà mai so cheur content,  
 A son tute tante vele  
 Ch' a van secondand ij vent.  
 Seve nen ch' a son d' volpasse,  
 E d' serpent stermà ant ij fior?  
 I stari sempre ant le strasse  
 An fertandve ansem a lor.  
 Gioventù, chitè le scufie,  
 D' autrement a v' costrà car,  
 Seve nen ch' a son d' bernufie  
 Incostante pi ch' 'l mar?

Pieve guarda ch'a son d'lanne  
 D'un umor malign e trist,  
 A son giust gate morbanne,  
 Ch'anganrio l'Anticrist.  
 Pr tireve a favorie,  
 A san deve d'bombonat,  
 Pr darè peui s'buto a rie,  
 Prchè a v'an ant ij garat.  
 La pi part son sospetose  
 A tal segn, ch'a s'fido d'gnun,  
 Son tant farde e malissiose,  
 Ch'a l'è mei a stene giun.  
 Dio guarda! sol ch'ai passa  
 Una mosca dnans al nas!  
 Dlong ai veulo dè la cassa,  
 E ciapela pr'l pnas.  
 Ai na j'è ch'a l'an d'idee  
 Stravagante ant'l servel,  
 Penso d'esse tante dee  
 Calà giù da l'ultim ciel.  
 Squasi tute son svergnose,  
 Pienne d'fum e d'ambission;  
 Finna coule ch'a son pi scrose  
 Tant a s' veulo tni d'an bon.  
 La soa pompa a veulo fela  
 'Tuti cousti brlicat,  
 S'a doveisso bin paghela  
 Con dij bei e bon crosat.  
 Quand a s'buto sauté an zara,  
 Van an bestia ch'a fan por,  
 Un canon quand a despara  
 Fa pa tant fracas com'lor.  
 A san fè le savurie  
 Quand a porta l'ocasion,  
 A l'è pr esse riverie  
 Dai codogn e dai tomon.

A son fiere e sostenue  
 Pi ch' la mare del folat,  
 Son nojose e borbotue,  
 E bisare com' d' mulat.  
 Lor a rio, e lor a piro  
 Quand ai par e quand ai pias;  
 Ma s'a s' buto a feve 'l moro,  
 Lo san felo longh un ras.  
 Sa comenso pieve an ira  
 E gardeve pr travers,  
 A san pieve tant d' mira,  
 Ch' a fan tut pr vedve pers.  
 J' è pa forma d' apasieje  
 Quand a son sul caval mat,  
 Tant le giovo com' le veje  
 L'an la testa pienna d' rat.  
 Gara aveje quaich conteisa  
 Con sti umor fait a feston!  
 Già l' è roba bele anteisa  
 L'an tavota lor rason.  
 Quante sufisticarie  
 L'an le done d' ogidi!  
 Tant le fomne com' le fie  
 Tute l'an l' umor cosi.  
 Ste lecoire da bardele  
 Son le mare dij ciacot,  
 Veulo fè le santarele,  
 E son pes ch' ij diavolot.  
 Quand a s' buto con d' ingiurie  
 A sgonfiesse coul gavas,  
 A fan pes che le furie  
 Quand a rompo so cadnas.  
 J' avri fait pr capareje  
 Tut lo ch' mai j' avri podu;  
 Ma s' i venne ampò a trucheje,  
 Tut vostr merit le prdu.

Veulo fè le dotorele,  
 E spuè la decision;  
 Ma le cousse moscatele  
 L'an un sugh pa vaire bon.  
 Cosa mai podraine dive  
 Dla curiosità ch'a l'an?  
 Mi la peus pa nen describe  
 Quand i steiss fin a doman.  
 Pr dla ciancia e dla babia  
 Ai na j'è pa mai mancà,  
 Una dona ampoch ardia  
 Con doe oche fa 'l marcà.  
 A son brave conterloire,  
 Prchè l'an dij bon sarsat,  
 J'è pa gnunne mei tesoire,  
 Pr tajè bin i colat.  
 Venta deje peui la drita,  
 Quand a s' trata d' critichè,  
 Coula li va gnanca dita,  
 Lor son meistre ant coul mestè.  
 A venran con bela rusa  
 Prometend pi carn che pan,  
 Ma ste nen a coula fusa,  
 Ch' a san bate e virè man.  
 S' i veuli lodeje, i peule;  
 Ch' a l'an peui sta cosa d' bon,  
 Confideje lo che veule,  
 Son segrete com' 'l tron.  
 A l'è brut quand a s' unisso  
 Contra d' un a fè consei,  
 L'è sigur ch' ai descutisso  
 Tuti i grop dant ij cavei.  
 Cherdme mi, descarognive,  
 E marceje nen apres,  
 A j'è meud a divertive  
 Senza andè a tacheve al pes.